

Ескі газеттер бетінен, Естелік алауы

Қасқабасов – озат малшы

Төлеген Қасқабасовтың тағдыры қиыншылықта қалыптасты. Оның жастық шағы Ұлы Отан соғысының ауыр жылдарына тап келді. Он алты жастағы бала өзі оқып жүрген тоғызыншы класты тастап, жұмысқа орналасты. Өйткені әкесі ел қорғауға аттанды, ал шешесі кәрі болатын. Соғыс Төлегеннің тағдырына өшпес ізін қалдырды. Ол қарт болмаса да, өз жасынан әлде қайда мосқал көрінеді. Бойы аласа, жүзін әжім іздері торлаған.

Соғыс жылдарында курс бітірген Төлеген шофер болды, комбайн жүргізді. Сол кезде тылдағы барлық совет адамдары «Бәрі де майдан үшін, бәрі де жауды жену үшін» ұраны төңірегінде жұмыс істеді. Төлеген тәулік бойы егін жинап, майданды астықпен қамтамасыз ету жолында жалықпай еңбек етті. Оның әкесі майданнан қайтып оралмады. Кейінірек шешесі қайтыс болды. Өмір қиындылығынан Төлеген абыржып қалған жоқ. Ол қаракөз Күлпәнға үйленді. Семьялы кісі атанды. Қасқабасов жиырма жылдан уақыт «Дружба» совхозының бірінші бөлімшесіндегі мал фермасында еңбек етіп келеді. Шаруашылықта мал өсіруші кадрлары жетіспегендіктен бұрынғы мамандығын өзгертуге тура келді. Жаз болса ол Күлпәнмен бірге жайлауға көшеді. Әйелі көмекші болды. Қыста мал қорада күтіледі. Төлеген ұзақ жылдар бойы өгізшелер бағып, семіртіп, ет комбинатына жөнелтетін еді. Оның есебінде жүздеген бордақыланған өгізшелер бар. Соңғы жылдары ұрғашы бұзулар күту тапсырылады. Ол бұзауларды өсіріп, бірінші бұзауланғаннан кейін басқа малшыға табыс етеді. Қазір қарауында 131 бас қашарлар бар.

Аға малшының ұлы комсомолец механизатор Қапыш, шофер Аман Сармолдин- көмекшілер. Қапыш әке жолын онан әрі жалғастыратын лайықты ізбасар болып отыр. Ол жаз күз бойы трактормен жұмыс істейді, ал мал қолға қараған кезде әкесіне көмектеседі. Аман да өзінің негізгі мамандығынан уақытша қол үзіп, малшы болып жүр.

Бөлімшенің тіпті жоба бойынша салынған стандартты қоралары село шетінде орналасқан. Солардың бірінде

Төлегеннің мал қорасы бар. Оның іші жылы, кең. Малшылар қашарларды тәулігіне үш мезгіл азықтандырады. Жылы күндері мал орамға шығарылып, сонда жемделеді. Рацион құрамында шөп, сүрлем, сабан, құрама жем бар.

Қорада мал суарудан басқа барлық жұмыстар қол күшімен атқарылады. Төлеген бұл уақытша қиыншылық екендігін, жем тарату, қи шығару сияқты ауыр процестерді механикаландырылар кезі келетінін жақсы түсінеді. Әзірше еңбектің басты құралы айыр мен күрек болып отыр.

Төлеген қысқы маусым басталғаннан бері мал шығынына жол берген жоқ. Күйлері де төмен емес. Қасқабасов басқаратын шағын да тату коллектив мал қыстату маусымын ойдағыдай өткізуді, қашарлардан жоспарлы төл алуды межелеп отыр.

Аға бақташы Қасқабасов «Германияны жеңгені үшін» медалімен наградталған. Совхоз әкімшілігі тарапынан алған алғыстары, құрмет грамоталары жетерлік.

Төлеген егде тартқан шағында өмір қуанышына кенелген. Оның ұлы Қапыш Совет Армиясы қатарында міндетті борышын өтегеннен кейін үйленіп, өз алдында отау болды. Оның кәсібі туралы жоғарыда айтып өттік. Қыздар Орынбасар, Салтанат, Гүлнәр мектепте оқиды ең кішісі Ләззат әлі жас.

Оныншы бесжылдықтың екінші жылы басталды. Бақташы Қасқабасов уақыттан оза еңбек етіп, жарысушылардың алдыңғы сапында болуға бекем бел байланған. Ол бөлімшенің озат малшысы Мұқай Ыдырысовпен социалистік жарысқа түсті. Жеңімпаздар атануы үшін екеуі де бұл күндері мал күтімін жақсартта түсті.

М.Кәмәлиев.

«Дружба» совхозының №1 бөлімшесі.

«Шампырақ нұры» 3-бет
13 январь 1977 жыл.

Дайындаған: Қорғалжын аудандық

мемлекеттік архиві

архивісі М.Узденбекова

#Qazaqstan30 #Aqmola30kz @ qazaqstan30jyl